

I CAMPANN

La campana du l'Ave Maria
ul din-dan dul riciamm du la Messa
in cuncert all'ingrand par la Festa
i rintocch par sunà 'n'agunia
pa'n pericul o 'n föögh a martell
a distesa pa'l nööv o pa'l bell ...

E la gent di paes, di campagn
la scultava 'l sunà di campann
ca 'l segnava 'l passà di giurnaa
e da nött i maraa ... dissedaa
a cürà 'l batt di ur par senti
quantu temp ca mancava a 'gnì dì ...

Mò vöran sentij pü
disan ca dann fastidi
ai delicaa d'uregia!
E pö ... hinn roba vegia
che mò, in dul domila
l'è ura ... da finila ...

E inscì sentiremm pü:
“... *il suon delle sciolte campane*
sonanti a la gloria ...”
né 'l: “... *tremolio sonoro*
ch'empieva l'aria e percotea nei monti ...”

Al sò post gh'è 'l burdell di mutur,
l'armonia e 'l cuncert al fann lur:
l'è tant bell e tant fin ... delicaa
da scultà cu'i urecc spalancaa ...
E tücc nüñch duaremm rassegnass
che la müstica, incöö, l'è 'l freccass.

- (*I versi in corsivo, in lingua, sono
di Carducci e di Pascoli*) -

Natale Gorini